






all
m
v. 573











M. ANTONII
MVRETI. I. C. ET
CIVIS ROMAN.

Oratio,

*Habita Romæ in Funere KAROLI
IX. Gallorum Regis.*



FLORENTIÆ
Apud Iuntas.

M D LXXIIII.

LE ANTONI

MARITIMUS

ROMAN

ONTO

Case

F

39

.326

1574 m u

THE NEWBERRY LIBRARY

THE NEWBERRY
LIBRARY



THE NEWBERRY LIBRARY

CHICAGO, ILL.


1882

M. ANTONII MVRETI

I. C. ET CIVIS ROM.

Oratio

HABITA ROMAE IN FVNERE
KAROLI IX. Gallorum
Regis.



OC igitur vnum restabat ad-
flictis ac pene prostratis infe-
licis Gallie rebus, ut Karo-
lus Rex, quo se illa recreabat
ac solabatur vno, de quo cogi-
tās, in quem intūēs, omnium
quas excepit acerbis mem-
oriam deponebat, cum bonorum animos ad aliquam
spem quietis erigere cœpisset, in ipso ineuntis adolescentiæ
flore, acerba atq. immatura morte raperetur? O fallaces
hominum spes, o incerta vota, o lubrica & ancipitia hu-
manæ vitæ curricula. Merito lacrymis oculi omnium
madent: merito omnia planctibus gemitibusq. circumso-
nant: merito vndiq. querelæ & lamentationes exaudiū-
tur. Tu ipse Beatiss. Pater, cuius & in prosperis rebus
spectata moderatio est, & in aduersis animi magnitudo,
in tanto casu cohibere dolorem non potes: quasq. lacry-
mas grauitas & constantia retinere, ac frenare consue-

A ij uerat,

Oratio M. Ant. Mureti

uerat, eas nobilissimi omnium regni miseratio, et paterna caritas elicit. Planeq. alijs in rebus quærenda est fortitudinis ac constantiæ laus: in tam graui vulnere tam dubijs ac formidolosis Christiana reip. temporibus accepto, immanis quedam duritia esset, non flere, non ingemiscere, non commoueri. Qualem enim quantumq. Regem, & quantam, non dicam indolem, quod tamen in homine adulescente satis esse videretur, sed quantam omnium regiarum virtutum copia præditum amisimus? Quem cum diuina prouidentia, annos natum non amplius decem, in illo celsissimo maiorum suorum solio collocasset; quantas ille iam tum, quamq. crebras, in illa ætate, quæ nihil cogitare, nihil loqui, nisi leue ac ludicrum, solet, inusitata cuiusdam & inaudita prudentiæ significationes dedit? Incredibile dictu est, quàm sæpe ille in deliberationibus publicis sapientissimorum senum sententiæ puerulus anteuertit, quæq. illi dicere in animo habebant, ea prior ipse protulerit: nemo ut esset, cui non, in tanta annorum immaturitate, tantam mentis & consilij maturitas diuinum potius quiddam, quàm humanum, videretur. Est certe, est aliqua vis originis ac sanguinis: quosq. magnis ac nobilibus populis rectores destinant præpotens illæ rerum omnium moderator Deus, in eis plerumq. virtus non expectat annos: sapientiæq. semina in eorum animis & comprehendunt facilius, & tempestiuus adulescunt. Iam quæ laus in filijs præcipua est, reuerentia aduersus parentes, & eorum præceptis ac monitis obtempe-

In fun. Karoli ix. Gall. regis

temperatio, ea ille ita præstitit, ut numquam omnino neque priuatis neque publicis in rebus voluntas ipsius à sapientissimæ matris consilio discreparit. Quid? in fratres quanta, quamque se omni ex parte prodens caritas? Quod & semper alias cognitum est & proximè cum ab Henrici Regis in Poloniam proficiscentis amplexu auelli non poterat, seq. a vita relinqui, quod ab eo relinqueretur putabat. De pietate autem in Deum, & de ardentissimo studio quod semper habuit conseruanda ac propaganda catholica religionis, quid ego nunc plura prædicem, aut quid res in omne æuum omnium scriptorum ingenia fatigaturas exornare in hac mediocritate ingenij, & in his temporis angustijs coner? Cui enim ignotum est, aut cui notius, quam tibi, Beatissime Pater, vobisq. omnibus patres amplissimi, quos ille labores pertulerit, quibus difficultatibus conflictatus sit, quæ pericula subierit, quibus damnis se regnumq. suum sponte multauerit, dum quiduis satius esse ducit, quam ut quidquam in Gallia, se viuo, de Christianæ religionis integritate minueretur? Qui quot annos regnauit, totidem continenter pro fidei defensione pugnauit. Etenim tætra illa natio perduorum ac profugatorum hominum, qui fraudibus ac mendacijs suis nuper delapsæ de calo & sibi solis patefactæ veritatis nomen obtendunt: qui, quod ad legem Dei cupiditates suas dirigere grauantur, legem Dei ad cupiditates suas detorquere conantur: quorum conspirationes
sub

Oratio M. Ant. Mureti

sub Henrico secundo inita, sub Francisco secundo
leniter patefacta, susceptis a Karolo regni habenis, aper-
te se ac propalam effundentes, florentissimum, dum per il-
los licuit, Galliae regnum omni scelere ac crudelitate lace-
rarunt, non tam id agebat, quamquam id quoq., ut re-
giam auctoritatem conuelleret, quam ut regnum ab ec-
clesiae communione diuelleret. At ille generosi seminis
adolescens, qui amorem dei & ecclesiae cum ipso nutricis
lacte suxisset, totaq. mente penitus combibisset, articula-
tim se prius concidi ac comminui passus esset, quam à re-
cta illa regula patriae & auitae religionis abduci. Itaque
dum purgare regnum suum illis pestibus nititur, dum il-
lius hydrae in suam, & aliorum perniciem contumacis ad-
sidue renascentia capita amputare conatur: quattuor-
decim, tot enim regnavit, annos in perpetuis bellorum flu-
ctibus, & in perpetua regni acuitae suae dimicatione trá-
segit. Ut, nisi pulcherrimum illud Christianissimi cogno-
men à maioribus suis hereditarium accepisset, id ipse sibi
posterisq. suis sua virtute peperisset. Quin etiam cum ca-
pitales quidam ac nefarii homines dicerent, facilem ei esse
et expeditam viam non modo ad pacandum regnum suum,
sed etiam ad fines illius sine ullo labore amplificandos ac
proferendos, si remittere aliquid de tanto illo vetustae reli-
gionis conservanda studio vellet: magno animo auersatus
ac detestatus illorum consilia, omnes sibi coronas, omnia re-
gna, omnia imperia sordere dixit praeter illa immortalitatis
corona, quam sibi in caelo repositam esse consideret. (cumq.

cum

In fun. Karoli i x. Gall. Regis.

eum exaggeranda hostium multitudine ac viribus perterrefacere vellent: Dominus, inquit, dominus ipse eos interficiet spiritu oris sui. Prope superuacaneum videri potest, cum de tam Christiano Principe verba faciam, quant a illius erga sedem Apostolicam observantia fuerit dicere. Quo enim quisq. Christum ipsum sanctius et religiosius colit, eo studiosius & magis ex animo vicarios ipsius colat necesse est. Quomodo ille de Pio V. cuius memoria in benedictione est, & seniebat & loquebatur? Quem sibi non hominem, sed angelum quendam humana inter mortales specie versantem videri dicebat: cuius monitus tanquam caelestia quadam oracula reuerebatur. Nam de te Beatissime Pater, qui successor illius omnium votis ex petitus, diuino consilio delectus; tam subita tamq. admirabili totius sacro sancti collegij cōsensione declaratus es, quàm magnifice in omni sermone prædicare solitus esset, dicere: si, quàm facile præstas, ut ab omnibus vno ore lauderis, tã libenter eos, a quibus laudaris, audires. Hic ille artibus ita sibi bonorū omnium animos voluntatesq. deuinxerat, ut, quamquam ex eius atate & temperatione corporis probabiliter sperare poterant, diu se illius virtute fruturos, cuperent tamen omnes, si fieri potuisset, partem aliquã vitæ suæ conferre ac contribuere, & annis suis vitam illius prorogare. Sed nihil in humanis rebus firmū, nihil stabile, nihil diuturnum reperiri potest. dum condofacere nos vult Deus, terram nobis, non pro domicilio, sed pro diuersorio datam: hanc, quæ vita dicitur, non tã

Oratio M. Ant. Mureti

vitam esse, quàm iter ad vitam: in cælo, non in terra, nobis esse spem defigendam ac collocandam: agit at omnia arbitratu suo, & quæ solida ac firmis nixa radicibus putantur, ea momento temporis vertit. Cum vexata tot calamitatibus Gallia paululum tolleret oculos, & Dei ac Regis sui perduellibus partim fractis ac domuis, partim captis ac comprehensis, tandem aliquando se post tot mala respiraturam sperare inciperet: ecce tibi lenta & omnem fallens medicorum industriam febris, vires adolescentis immortalitate digni, & nati ad relinquendum omnibus bonis perpetuum desiderium sui, ita paulatim attriuit ac labefactauit, ut ad postremum ineuitabilem ei attulerit ex hac vita migrandi necessitatem. Quod ubi percerebruit, qui tunc plangor omnium, quæ complorationes, quæ lamentationes fuerunt? Alius sibi scindebat capillum, alius lacerabat genas, alius pectus & humeros crebris ictibus verberabat; alij interire amores ac delicias Galliæ, alij cadere columnen religionis, alij catholicorum præsidium deiçi, alij alia, quæ diuersis diuersa non diuersus suggererat dolor, miserabiliter querebantur. Ipse vnus interritus, & æquisimo animo exitum diuinæ voluntatis expectans, cum matrem, uxorem, fratrem, ceterosq. propinquos ad se conuocari iussisset: primum quidem sacramenta, quibus morituri præmuniri & Deo conciliari solent, omnia & poposcit, & magna cum animi summissione ac diuinæ maiestatis veneratione suscepit: deinde vero contestatus, eo tantum sibi molestam esse mortem, quod fratrem suum,

In fun. Karoli ix. Gall. Regis.

suum, tum Poloniae, mox etiam Galliae regem futurum, moriens complecti non posset: ceteroqui gaudere se, quod tantum successorem habiturus esset, cuius singulari, et tot iam documentis comprobata virtute, non dubitaret fore, ut res Gallicae feliciter componerentur: interea obtestari atque obsecrare matrem, ut regni gubernacula susciperet, quaque prudentia regnum sibi tot annos conseruasset, eadem fratri suo conseruaret: sese iam tunc omnem potestatem regiam in eam usque ad fratris reditum transferre; hortari ceteros, ut ipsius primum, deinde fratris, cum reuertisset, imperio amanter ac fideliter obtemperarent; praecipue autem, ne quid vnquam prius aut antiquius haberent conseruatione catholicae religionis: ex ea bona omnia fluere: ea neglecta, collabi ac concidere omnia: Sed iam valete, inquit, & mei memores este: ego enim ad Deum vocor: quem ut aequiorem ac placabiliorem peccatis meis iudicem experiar, vestris me omnium adiuari precibus postulo. Haec fatus, deficiente iam & moribunda voce, tuum (Christe Iesu nomen inuocans, tuam sanctissimam Virgo apud filium opem implorans, ad vos, ut confidimus, euolauit. Ac si quidem ipsum spectemus, gratulari ei potius quam lugere debemus. Regnum enim terrestre caelesti, laborem quiete, mortalitate immortalitate mutauit. Quod mortuus est, humanae fragilitatis est: quod ita mortuus, diuinae cuiusdam felicitatis. Bonum certamen certauit, cursum consumauit, fidem seruaui. Aut iam coronauit eum Deus, aut breui, tuis Beatissime Pater, & totius ecclesiae

B

clesiae

Oratio M. Ant. Mureti

*clesiae precibus adductus, coronabit corona iustitiae, quā
 promisit diligentibus se. At illam tot regum matrem, to-
 ties iam custodem ac conservatricem regni, ipsa sua felici-
 tate miserandam, quo nunc, quo tandem esse animo credi-
 tis? Quae ex summis honoribus summos dolores consecu-
 ta, ter iam, & in viro, & in duobus filiis mortua, vitae suae
 superstes, toties ore suo eorum clausit oculos, a quibus clau-
 di cupiebat suos: tam saepe eis officia praestitit, quae sibi
 ab eis praestari maluisset. Quid illa fortissimarum domi-
 na gentium Galliarum quae sibi eodem funere cum Rege suo
 efferrī visa est, quae iacet adhuc perculsa & attonita tan-
 to vulnere, metuens, ne, illius atrocitate, etiam illa, quae cō-
 sanuisse videbantur, recrudescant. Pro Deus optime ma-
 xime, etiam cum vlcisceris, benefice, etiam cum poenas exi-
 gis, misericors: quibus tam gravibus culpis tam diuturnā
 in se iram tuam Gallia provocavit? Quattuordecim iam
 anni sunt, & eo amplius, cum illud potentissimum & me-
 moria nostra florentissimum regnum perpetua bellorum
 civilium serie ita & ab alienis & a suis vexatur ac diri-
 pitur, ut de eo iam dici possit, quod scriptum est apud pro-
 phetam. Residuum erucae comedit locusta; & residuum
 locustae comedit bruchus; & residuum bruchi comedit
 rubigo. Atque ut magis intelligatur, id diuina ultione fie-
 ri, quoties inibi esse videtur, ut iam iamq. componantur
 ac tranquillentur omnia, in ipso; ut ita dicam, portu fran-
 guur navis. Properarat Henricus I I. pacē cum Philip-
 po rege Catholico quibuscumque condicionibus facere, ut ex-
 pedius*

In fun. Karoli IX. Gall. regis

*peditus belli curis, huius mali nascentis semina elideret:
In ipso eius rei conatu ac molitione, inopinata morte subla-
tus est. Sub Francisco secundo, conspiratione detecta, spes
obiecta erat fore, ut paucorum supplicio, ceterorum auda-
cia in perpetuum reprimeretur. Ante ipse mortuus est,
quàm de sonibus comprehensis supplicium sumeretur.
Nunc nuper eò rem perduxerat Karolus Nonus, ut o-
mnes instare finem malorum existimarent. Alter deo
visum est: qui Henrico Tertio Galliae & Poloniae regi,
quem tam multis tamq̃ illustribus argumentis sibi caris-
simum esse declarauit, hanc felicitatem, ut speramus, re-
seruare ma'uit. Neque dubium est, hoc ita euenturum,
si omnes nos a vitijs nostris auersi, quae dei placandi cer-
tissima ratio est, tota mente còuertamur ad Deum, eumq̃
adsidue obsecremus, ut compescat iram suam: & quādo
Karolum in sinum, ut speramus, suum excepit, Henrici
Tertij ductu, sub Gregorio XIII. raptores quidem lu-
pos interfici, oves autem, quae aberrarunt, in ouile suum
reduci velit. Ita eueniat, Ita eueniat domine Iesu, cui laus
omnis & gloria debetur in omnem aeternitatem.*

D I X I.





KAROLVS. IX. REX. GALLIAE. NA
TVS. EST. V. KAL. QVINCTIL.
MDL.

REGNARE. COEPIT. NON. DECEMB.
M. D. LX.

OBIIT. III. KAL. IVNII. M. D. LXXIIII.
IVSTA. EI. PERSOLVTA. SVNT. RO-
MAE. IN. SACELLO. PONTIFICIO.
X. KAL. QVINCTIL. M. D. LXXIIII.



